

philippine studies

Ateneo de Manila University • Loyola Heights, Quezon City • 1108 Philippines

Mausoleo

Herminio S. Beltran Jr.

Philippine Studies vol. 53, no. 2&3 (2005): 364

Copyright © Ateneo de Manila University

Philippine Studies is published by the Ateneo de Manila University. Contents may not be copied or sent via email or other means to multiple sites and posted to a listserv without the copyright holder's written permission. Users may download and print articles for individual, noncommercial use only. However, unless prior permission has been obtained, you may not download an entire issue of a journal, or download multiple copies of articles.

Please contact the publisher for any further use of this work at philstudies@admu.edu.ph.

<http://www.philippinestudies.net>
Fri June 27 13:30:20 2008

HERMINIO S. BELTRAN JR.

Mausoleo

*(Sa pag-iinspeksyon ng mga bagay na inilalako
sa auction sa Manila Film Center, 24 Setyembre 2004)*

Pagpasok mo sa loob ng minsang marangyang
Gusali na pinagdausan ng mga piyestang
Pinagningning ng mga bituin mula sa iba't ibang
Langit ng daigdig, nilusob ng hanging inaalikabok
Ang iyong ilong at бага. Sinundan mo ang anino
Ng isang rehimen sa mga likaw ng koridor
Patungo sa kanyang abandonadong kusina at salon.
Tumambad ang tambak ng mga bandehado,
Plato, plorera, baso, kopita, tinidor, kutsara—
Tanso, pilak, salamin, porselana—
At narinig mo ang di-pa-rin-naglalahong
Halakhak ng mga malulupit at makapangyarihan.
Narito ka upang sa likod ng lumipas na mahigit
Dalawang dekada, makisalu-salo sa mga mababangis
Na alaala. Pagdaan mo sa mga kuwarto
Ng mga tahimik na't kinakalawang
Na kagamitan, mga kahon at muwebles
Ng minsa'y upisina ng pananamantala,
Naramdaman mo ang takot. Hinihigop ka
Ng alikabok, ng mga kalansay
Ng madla at kasaysayang nakalibing dito.
At tila sinabuyan ka ng malamig na alon
Mula sa Look ng Maynila na nananatiling
Nakatiwangwang at nakalalason sa labas ng gusali.
Tila kinurot ka ng mga multo ng maraming
Pagguho. Nayanig ang iyong ulirat.
Tumakbo ka sa bukana. May ibinubulong
Ang mga kaluluwa.

(25 Setyembre 2004)